

張文烈公軍中遺稿

何耀光署




PL  
2698  
.C31









Digitized by the Internet Archive  
in 2010 with funding from  
York University Libraries

明張家玉撰

軍中遺稿

何氏至樂廬叢書之九

一九七五年四月印



張文烈遺像



張

文

烈

遺

墨





## 重刊張文烈公軍中遺稿序

甲申之難，清人旣入關，史可法拒多爾袞之招死義於揚州，張家玉叱修養甲之誘殉節於增城。二公忠烈事蹟，具載簡冊，數百年來，白首黃童，猶津津盛道其事弗替者，以二公秉至大至剛之氣，負至強至烈之志，率無援之師，當重圍之困，舍生取義，足以垂範千秋者也。

吳以連於張公詩序曰，張公恂恂儒雅，弱不勝衣。然其行也，操厲冰霜，氣貫日月。是知至和平者，至激烈，至受逼者，至剛強，又足以證明浩然之氣，澎湃之情，是集義所生，一發而無可止者。夫氣養於常，而志見於變，其氣其志，又必時露於言，或寄於詩，故曰讀其書而知其爲人，讀其詩而知其所志，誦張公之詩，當識其處夷夏陵替之間，必求取義成仁，無待觀乎增城之役，始明張公何以身披亂箭躍野塘以沒，而不爲賊寇所辱也。

張公以盤礴之才，遭板蕩之局，於帷幕之中，車馬之上，猶能成詩逾百，真兼文武之美矣。公亡之翌年，張孟器輯爲軍中遺稿，入清以還，遂成禁書，罕有流傳，民初張其淦

鄧秋枚曾刊張文烈遺詩，張伯楨復刻張文烈集，然四十年間亦已少見。年來發現張公軍中遺稿鈔本，汪君孝博持以示余，余向慕張公忠烈，又以此稿較之張鄧張三本，多永曆時羅吳二序，及詩二十首，至爲賅備，爰付之剞劂，並以屈翁山所爲張公行狀附後，藉寄表彰之意，使其精忠壯烈之行，彪炳人寰，庶有助中華民族精神之發揚光大也，是爲序。

一九七四年歲次甲寅十二月何耀光序於至樂樓



# 軍中遺稿序

芷園張先生之將舉義也曾語余曰家玉受

烈宗知遇通籍金閨甫三閱月而罹國變罵闖殿廷弗

獲抉齒碎軀報國迨從龍閩海復承

隆武皇帝詔曰朕以子子爾爾當以父父我玉重以此感激不

慚蚊負謬攝虎符雖許灣之捷新城之屭功不掩罪然此心刻刻已付死生於衽甲矣况乃今日攀髯

莫逮赤縣爲胡天下封疆所餘復幾以堂堂中國使無翟讓睢陽之流則六合雷同幾於無色試將大

勢籌之餉匱兵微知戰必敗而敗必死不死豈所以報

二帝哉廼立起書其百尺樓曰子不辱親爲

孝臣不負君爲忠書罷遂擲筆太息不語嗟乎先生矢志若此寧直金石可開而已耶嗣後水陸間關

百戰散復聚蹶復興能使四方義士甘與同敗而無怨言新安布衣陳文豹破萬金之產全家殉國於

此亦足發明先生忠誠鼓勵大有激揚於世教矣繇是先生賈數挫之憤收拾餘燼列爲虎豹犀象四

營率赴增城以決借一之舉然天未悔禍星隕鳳坡卒殉前言血戰而歿議者乃謂先生屢復名城偉

得俛失勞而無功不知先生是役也爲兩粵分犄角之勢爲一身決榮辱之途爲萬古正華夷之分無



封疆之責而身死封疆其視江淮保障爲何如也尙可以區區成敗論先生哉當虜騎追迫顛沛流離夜不解甲使他人於此不知幾許蹙蹙靡騁而先生乃能據鞍草檄橫槩賦詩所至留題輒盈牆壁抑何從容整暇也畧概先生自春徂冬凡兵間履歷一勝一負皆見於詩恨多遺逸弗存今所錄於八月以後者篇什雖少率皆貫虹噴碧之語讀之令人悲其志惜其遇憫其忠而復壯其氣魄如對峴山之碑不覺墮淚豈非忠義之言鑲在人心自難磨滅者歟且先生自弱冠時輒慷慨以古人自負於往籍無所不窺其爲文似韓蘇律詩似劉錢而選體則殆頴頑二謝矣先是丙戌冬先生謀倡義旅悉哀生平著述授之剞劂惜壽梨未竣燬於兵燹茲先生令姪孟器民部蒐刻軍中遺草特崑山片璧耳然詩豈所以重先生哉先生遠祖曲江相業文業於燦唐室今 聖主中興首旌殉節之臣而先生孤忠偉烈赫彰彝鼎洵足繩祖武而昭來許吾知千百世誦先生詩想見先生爲人尙與荆虹萇碧共凜凜如生也先生之死爲不死矣是爲序

昔

永曆戊子孟冬穀旦同邑布衣徵士盟弟羅應垣薰沐□□

# 軍中遺稿序

丙戌秋虜騎深入嶺南虔州失守國事倥傯時我

皇上正位端水當事者弗以封疆爲重而且操同

室戈遂致胡腥入粵蹂躪城池變亂正朔戕賊生靈闕剪王室帶甲橫行號鋒莫當從者如市人盡犬  
羊無復生理噫此誰非衣冠中人而暴棄如是豈我 祖宗用夏變夷教化不足千古耶而乃陸沉湮

沒僅以乾坤義旗孤寄天末海隅一見于秋翁今贈忠烈侯陳老先生一見于芷翁今贈增城侯張老

先生也張芷翁年少登甲詞理名臣恂恂儒雅弱不勝衣舉義時予避佛山聞而訝之有孝廉姓龐者

持其遺逆詩讀史十首以示余余捧而讀讀而掩袖涕泣而又繼之怒髮指也嗟嗟天下豈無中國之

理乎而堂堂我輩當此時令腥氛滿目不能揀手而居平誓請纓讀正氣歌何爲者也恨不能翼而從

之殆望日如年而余沉潛塵市買卜聲色冀我師之早至迨見逆修銳甲向東宜而踉蹌敗挫輿尸而

歸者數次而方幸張先生之破寒賊胆指日光復□□□□□英雄國艱未脫我師纏綿未□□□

加以奸人煽燄正氣黨衰力屈勢單遂血壁增城而魂消珠水不亦可惜也哉舉事時□氣尙在人心

如雲如雨之□幾乎撐起炎天計入粵虜騎之挫□于到潛者爲甚故河流泛辦笠之屍泥淖坑銀燈  
之馬我明白首黃童咸思蓄髮以待致虜怒益裂而肆禍益酷赤族屠村無所不至而人盡摧靡矣嗟  
嗟何生民之不幸耶然得此一敵□□□□□□今上之以一旅一成留統□□□□□□正者張先  
生之功居多□□□□□□江九江固一村也聞其舉義時□□伏桑麻林以待戈砲所出虜不知其  
處殺虜人馬無數然而地于廣城爲近又以奸人倚虜爲利更甚於東官故秋翁兵□羊城而間諜敗  
成者卽出於其麾下陳老先生亦不暇計其成與否也盡力而已陳秋翁之受禍比張公爲甚然而甚  
與否二公者烏乎知之嗟嗟使二先生而在吾知其振起忠義明春秋之法以佐中興其於腥羶游魂  
固不□□□傳檄而喚醒之是何也□□□□□□而邪終不勝正也不肖偷生□□□□先生多矣  
值 今上篤意中興加與全典雖草創未備而動念凜如尙祈英靈不泯以爲中興助讀張老先生遺  
文□不禁數語以弁於首而併及乎陳老先生也

永曆己丑上元日承乏封司事年家眷晚生吳以連頓首識於端水之署



張文公

是奇男子也有強梁向海東

如逢我耐得蘇卿十九年

眞天子定有王豐勒馬歸

千古事肯隨會稽著青衣

初亭淚好向中原識范陽

太守洛陽橋畔舌縱橫

可憐一片珠江水翻作當年凝碧池

門不忍聞今今昨昨紛紛礪州縱有黃龍瑞丞相傳來不姓文

憶昔懸帆出建陽橋頭卜肆尙傳芳而今不管天人數却笑勞勞謝侍郎  
絳闕天魔舞不休義旗昨日起濠州東官曾有誇封禪掃却氍毹拜冕旒

讀文文山先生集不覺飲泣集先生句成六絕

南望端門淚雨衣冠塗炭可勝羞遙憐海上今塵土無限斜陽故國愁  
風打船頭繫夕陽孤臣性命寄何鄉江山有恨消人骨南北今年幾戰場  
魯連大節豈容磨回首中天感慨多春事暗隨流水去江山如此故都何  
國亡家破見忠臣何事癡兒竟誤身借問一門朱與紫黃金橫帶爲何人  
庭靜堂堂負直聲江南匹士死猶榮幾多江左腰金客不值人間一唾輕  
倭倭乾坤靡所之飄零回首壯心悲素王不作春秋廢猶抱春秋莫我知

述志

赤悃曾披白日前肯將然諾負初年臣心一塊孤忠鐵誓與清夷不共天

出師

偶整王師陌上游村莊兒女盡凝眸請看我亦何曾異畢竟人間不剃頭

過荒村四絕

幾日經行白骨堆蕭條窮巷哭聲哀亂離我亦亡家子總爲君王冒死來

縹緲前途路欲迷黑雲留雨四村低山靈似笑征人馬何事勞勞不住蹄

野塚蓬丘指顧中青山斷送幾英雄臥龍躍馬今何在博得浮名總是空

狐豕妖氛障太清幾回翹首隔西京朝昇更有扶桑日依舊紅光滿大明

嘆變

亦知牢落苦奔波其奈冠裳掃地何一自首陽人去後更誰重唱採薇歌

傷族罹禍

誰計忠成九族殃行藏我亦似文方但能完得君臣節磨涅從他也不妨

途中八絕

瘦馬崎嶇不肯前天涯飄泊苦烽烟何時范蠡功成去泛泛滄江一小船



凜烈寒威戰碧蒼蕭蕭原野盡荒涼  
櫻桃嫩李紛零落獨看青松不避霜  
馬上看山疊疊青青山無地不遑腥  
誰堪滿目蒼涼處俯仰興思不涕零

燈下嬌姬月下絃風流曾泛太湖船  
如今回首神京處腸斷西風憶往年

雲淨天空朔氣寒舉頭何處是長安  
那堪幾點孤臣淚灑向楓林帶血看

縹緲疏林在隔山數聲鷄犬白雲閒  
潞洄一帶寒溪淺疑是秦人避此間

家藏三畧已湮消動業誰當比漢朝  
遙憶仙人遺履處幾回翹首望圯橋

高風曾見幾人稱綱紀先朝久已傾  
獨有南還陳太史文章節義兩留名

### 將發

東泊西飄寄一身頭顱空帶楚冠塵  
千秋獨有文夫子同笑迎降賣國人

### 偶聞童僕夜話

不達時情數蠢奴猶思家業苦嗟吁  
此身已置存亡外寧計田蕪與地蕪

### 痛悼先塋被伐

廬屋空餘一炬灰祖骸仍暴委蒿萊可憐忠孝難兼盡血灑西風寄夜臺

早行河源

野外燐飛閃閃明奇鳥□□互悲聲沙場滿眼英雄骨獨有流波咽不平

虜騎追迫投宿村莊是夕有書生姓何者積誠邀我拜天欲卜乘除之數以定國運意欲提兵助我也廣之

俠骨應知久著名流離歧路識班荆憑君莫問乘除數天地頑冥亦不靈

十九日楊邦達大戰於分龍嶺斬虜首千級次日又將戰於牧牛坑其行也詩以壯之

前宵殺透幾重圍勇矣將軍壯國威此日定應擒拓跋莫教胡虜隻輪歸

時事

奸邪昔日肆豪驕天道於今報始昭堪笑李司徒播毒東門牽犬幾曾饒

自舉師不克與二三同志怏怏不平賦此

落落南冠且笑歌肯將壯志竟蹉跎丈夫不作尋常死縱死常山舌不磨

漫興

擬卜幽居絕世塵桃源無路可逃秦朝來怕縱瀟瀟目愁見青山換主人

追昔

內苑曾推蓋世豪花磚睡起日輪高如今轉憶宸遊地羞見承恩舊漢袍

聞鷄

惱夢初驚月落時鷄聲錯聽赴朝儀鵷班散處形塲晏記得承恩退食遲

春閨寓興

關塞迢迢萬里賒紅顏多少老風沙祇圖肘後黃金印誤擲人間幾歲華

竹林啼鳥送春暉何事行人尚未歸惆悵夜來窗月白夢魂飛不到金微

春病春愁兩不寬愁連烽火是長安何時得起龍城將早向陰山解戰鞍

謁大司馬自翁袁老先生遺祠

司馬遺忠尙有祠重來客淚灑荒碑長城借得先生在肯致中原苦亂離



讀于忠愍楊椒山兩公行錄不覺拍案

前有于今後有楊鬚眉男子兩堂堂全忠自古難全孝何況家亡與國亡

寓目愴懷

三十無成荏苒過眼前羞見舊山河人民城郭皆非昔怪得文山感慨多

馬上感嘆

戎馬奔忙日易斜風塵荏苒一長嗟荒村寥落炊煙絕愁聽垂楊噪暮鴉

郊原繚繞暗戈兵笳鼓聲悲慘客情心折幾回翹首望路迷何處是西京

軍中夜感

慘澹天昏與地荒西風殘月冷沙場裏尸馬革英雄事縱死終令汗竹香



# 張文烈公軍中遺稿

東莞 張家玉 玄子著

得蕭年兄西京大捷之札志喜

微臣忽報復西京舉手良深舞蹈情萬國戎師今四集九天威福正中興蔡城再見鵝鳴捷肥水重聞  
鶴唳驚早晚賢王應授首長驅還擬掃龍庭

夜雨

欹枕更殘夜正深淒風苦雨助哀吟  
蓼莪忍誦思親句犬馬難忘報主心  
望入江關愁極目夢回京國涕沾衿  
離離禾黍添新恨何日西歸得好音

不寐

蓬窗獨坐氣颼颼擊楫誰憐士雅憂  
撒手已無兒女戀回頭寧有室家謀  
須知白水仍興漢未信西戎可繼周  
惆悵胡塵思欲掃幾回中夜舞吳鉤



難中聞逆首買健兒刺余獻虜予付一笑

蒼狗浮雲祇浪猜山河風景已相乖  
澄清祖逖懷空切恢復文山志不諧  
縱死但知存骸髀達觀原自外形骸  
殺身取義吾曹事志士何須問葬埋

雨行馬上縱目山川愴然追念余祖九齡公至宋世傑公皆孤忠表表凜然萬古

處處洶洶苦戰征炎方烽火幾時平  
雨聲偏灑孤臣淚風景空憐異代情  
國破匈奴千古恨心懸明主一身輕  
唐朝宋室家聲在肯使吾曹落後名

丁亥重陽悼陣亡將士

回首天涯憶故鄉□聞節候又重陽  
斷腸何處啼猿月警夢當階唳鶴霜  
擊楫幾時清海浦枕戈猶未掃櫓槍  
可憐多少英雄骨空照黃花吐烈香

夜坐

月落孤齋夜色濃  
戍樓深處鼓鼙身如繞樹南  
飛鵲影似傷弓北地鴻  
往事肯隨春夢散斜陽猶憶日輪東  
英雄成敗非今日狐史千秋自有公

月中早行馬上有感

匹馬蕭蕭欲發遲天涯游子去何之行人弓箭戎裝早載道兵戈羽檄馳淚灑杜陵偏我屬身如玉粲  
好誰依那堪澹月疏星夜不似南宮待漏時

蚤路

征衣纔解又嚴裝祇爲戎機晝夜忙九縣飄搖何日定三精昏暗幾時光中原痛哭悲塗炭左袵驚看  
盡犬羊慚愧皇唐誰再造千秋吾欲弔汾陽

謁大司馬自翁袁老先生遺祠愴然有感

弔罷遺祠淚幾揮遼陽回首事成非空留冷廟滄江上不見犁庭鐵馬歸星落尙疑陰雨暗風高猶憶  
陣雲飛只今羽檄紛馳急那得先生再解圍

舟中

西風瘦盡骨稜稜甲猶能日飲冰暗地殘氛終北掃經天朝旭正東升千秋笑我愚張浚萬古令人  
唾李陵偶讀程嬰忠鑒錄幾回孤憤淚沾膺

夜走博羅

舉目烽煙黯自傷胡笳吹處似邊方  
眞同喪狗生無愧縱比流螢死有光  
力盡張良虛博浪時窮許遠失睢陽  
當存百鍊堅金志捲土重來未可量

匹馬孤軍共一行旌麾凌亂勢蒼黃  
雲崩日落豺狼嘯地黑天昏傀儡強  
報國誰同堅鐵石捐軀吾任笑愚狂  
春秋勿謂千年絕身有遺編尙未亡

黃牛逕

踏遍天涯雪復霜舉頭西望望冠裳  
從拚俠骨齊生死終笑奴顏拜犬羊  
敢謂龍韜兼豹畧能圖鐵券與貂璫  
願酬明聖垂衣日卽向煙霞臥子房

悲秋

一夜蒼山萬木枯霜風颯颯滿平蕪  
涼回宋玉悲難□愁劇張衡詠亦無  
玉署昔年酣翰墨泥塗今日飽馳驅  
可憐司寇堂堂職忍負君王作叛奴

過馬溪山



縱馬揚鞭躋去程馬溪山上馬蹄輕江聲似寫前朝恨山色空留故國情入望烽煙迷遠近窺人豺虎漫縱橫孝陵佳氣應長在會見中興一旅成

宿村莊

陰風漠漠冷孤村寥落天涯憶故園勁草也知難偃地芳蘭何意思當門夢回旅帳神猶奮淚灑征衫血有痕愁絕鷄聲催戍角不堪清夜舞劉琨

感遇

顛倒蒼蒼亦可憐江山何地是安然宵行秣馬傳殮食夜宿連營抱鼓眠雪骨寒梅真我瘦冰心皓月爲誰圓從今一斗孤忠血終化春山哭杜鵑

奔走孤臣膽備嘗死生誰復問蒼蒼獸蹄鳥跡交中國霧慘煙荒滿戰場昔日人謀應有定如今天命不予常江山無限淒涼淚拭向西風灑夕陽

行次白石堆投宿村莊有園花盛開感賦

銀屏金屋鎖寥寥人物傷心換六朝芳草正添行客恨名花仍放舊時饒啼殘杜宇聲聲血零落東風

處處飄誰念多情張子野傷春懶上洛陽橋

營中晚坐

轅門坐冷夜悠悠  
烽火低飛哭鬼幽  
萬里山河悲戰角  
百年身世負虛舟  
腥羶我抱淪胥痛  
冠履誰甘倒置羞  
欲借朱雲當日劍  
奮來高斬佞臣頭

軍中懷陳長園

回首羅浮片月娟  
伊人何處冷風煙  
離羣忍聽三秋雁  
避難曾同一葉船  
盃酒不堪論往事  
南溪猶憶夜流連  
幾回話到中興處  
未卽聞鷄已惘然

燈下偶讀武子十三篇

期許當年頗覺迂  
壯懷曾愛讀陰符  
人間任笑儂狂士  
我亦還憐彼鄙夫  
飲恨愁來思復楚  
憂天奮處欲吞胡  
封侯自是尋常事  
不數功成萬骨枯

憶余爲諸生時痛哭當事素餐者  
若而人通籍後轉痛當事誤國者  
若而人甚於若而人也吁祖  
宗三百年大器遂使獐頭鼠目輩  
一朝墮甑良可痛也良可哭也

朦朧推轂委端征無限傷心嘆我明大老高謀推避□將軍妙策只行成輕弓短箭來胡馬棄甲投戈  
□□兵誰使 至尊虛拊髀坐令談笑失周京

軍中懷羅徵士孺文從軍不果

渺渺伊人忽我思山川回望隔黃旗南陽肯信能長臥采石遙憐待出奇孤憤久知思漢室同仇應共  
振王師寒光夜發芙蓉劍正是期君出匣時

軍中懷康之姪

荏苒星霜節易徂天涯零落各歔歔傳余被擄情元僞聞爾從胡事亦迂斬佞莫忘朱子劍傳家休負  
石公書當年淝水稱能事折屐遙緘望有餘

屢欲提師入衛西京奈前途阻絕不果

透甲霜風撲面沙孤臣飄泊久無家北憐戎犬棲黃屋西望冠裳舉翠華我寄蘭猗幽裏操誰吹胡拍  
慘中笳搖搖念此心逾折三匝愁聽繞樹鴉

軍中聞諸謀士夜譚



鼓風高殺氣浮橫天太白幾時休犯疆厭見狼頭虜奇相難逢燕頤侯祇爲綱常爭萬世寧徼竹帛  
記千秋何當鐵騎犁庭日重見燕然片石留

月夜避地徵兵

慘慘西風動客衣傷心回首月明時皇天有意應相福白刃無情亦不辭昔歲邊疆喧戰馬于今邑里  
豎旌旗功成何日酬 明主再見垂衣馭四夷

輓陳同盟

國破家亡事兩傷孤忠羨爾鐵肝腸盟心共信真豪傑戮力同驅假大羊激烈剛風生凜凜從容正氣  
死堂堂獨憐奇計人空老誓報如今祇子房

撥悶

欲撥牢騷強笑歌此身其奈此生何人憐歲月優游少我抱山河感慨多報國其才成坎凜思親有淚  
但滂沱年來枯盡英雄血獨有吞胡志不磨

道經烏龍岡投宿沙村王守愚茅堂

行踪忽似羽毛輕  
奄忽能兼十里程  
煙火數家連野□  
漁燈幾點傍蕪城  
人民左衽汙胡俗  
山水中原□  
京獨有茅堂  
今夜月清光猶似舊時明

憶京華

崑崙天府兩金湯  
妖氣蒼茫白日荒  
玉減香消虛少嬪  
花殘歌散冷朝陽  
少嬪朝陽皆宮名  
銅駝北望沉  
荆棘鐵騎南侵滿  
戰場回首可憐關塞月  
擣衣砧上爲誰忙

憶朝

憶昔京華玉署連  
五更清珮入朝天  
闐闐絲管華燈下  
集集夔龍綵仗前  
虎帳罷收宮漏箭  
螭階初晏  
御爐煙祇今羊犬縱橫處  
誰挽天河洗穢羶

傷我明所用不得人致有今日之禍

徵兵轉餉日何窮  
少府金錢盡廢供  
不見犁庭殲醜虜  
惟聞棄甲走元戎  
摧殘禁苑煤山火  
零落朝儀  
建業鍾搖憶鼎湖  
兼雪窖忠魂曾有幾從龍

北向天驕憤未平  
無衣痛哭不成聲  
攄忠若箇眞披瀝  
報國何人死戰爭  
漢室威儀他日望  
商郊禾黍

此時情鑒兵幾厭民心苦猶見經天太白橫

防邊歲歲事端征不見顛連九廟驚古堞有城荒白下斜陽無語老燕京單于夜嘯巡屯馬上將壇空  
宿衛兵惆悵行吟秋月白不知今夕爲何明

感憤

積弊和戎久已知不圖大木竟難支崑崙漫憶三通鼓肥水難同一局棋今古無窮終是幻死生有盡  
亦何悲夷齊去後無知己欲上西山繼採薇

榕溪曉發

風送牙檣復溯流此身漂泊一虛舟雖無諸葛平蠻策且作宗生破浪游死去不妨蠅作客生還何必  
爵通侯年來怒髮衝如戟憤處猶堪刺虜頭

憶昔燕畿之變

首逆何人賣國先遂令滋禍竟綿延內廷已失金吾守外地寧誇鐵甕堅萬井桑麻鋪戰壘千家城郭  
靜炊煙誰憐去國孤臣遠禾黍興悲幾涕漣



參將楊邦達陣中生擒渠魁五人曰萬中永俞世安何碧奇鄧璉張洽蒼鞠之皆河南人也未正  
刑我師又北五渠遂得狡脫良可嘆也

□寇一軍邦達最縛來五虎僞狼頭七擒瀘水誰能駕三箭天山爾定優獨惜拘原將寢革重嗟脫網  
漏吞舟誓期共勵桑榆志肯使胡奴片甲留

秋宵不寐

請纓猶未斬樓蘭始信從軍行路難驕子秋高肥馬肅征人霜重鐵衣寒夢魂報國三更憤懷抱思鄉  
千漏殘遙憶鰲洲烟月處幾時歸弄釣魚竿

宿田家早起

咿喔鷄聲促曙光勞勞人起戒行裝亂離幾厭兵戎苦迢遞徒悲道路長半榻雲窩猶未煖一宵萍水  
又他鄉何時得似王摩詰睡到鶯啼懶下床

哭楊邦達

昨夜西風折義旗今朝邦達竟何之丰標無復張文遠酣戰誰方許虎癡忠魄想應隨烈帝英魂猶自

繞王師睢陽誓志終爲厲願壯山河殄裔夷

舟中夜泊

□夜羈人泊海涯朔風烈烈透霜華飄零有劍爲知己迢遞無緣更覓家三窟但工捐漢地孤忠誰□  
□胡沙此身不抵黃龍府誓不重歸拜白麻

對月

對月愁吟影自憐癯癯瘦骨欲撐天親提白刃驅前部豈爲黃金肘後懸刁斗夜寒旌旆肅胡笳宵動  
旅魂驚何時凱奏恢京日換却團花拜御前

秋宵月夜

刁斗烽煙處處驚長途來往盡遊兵那堪冷月寒砧夜又聽西風北雁鳴京國幾年金闕夢鄉關何處  
白雲情奮來按劍轅門坐愁對旄頭斗外橫

舟中月夜

渺渺長江水接天帝京西望轉淒然金戈鐵馬無寧土錦纜牙檣有戰船離亂烽煙叢此日風流簫鼓

換當年誰堪舊日長安月多照平沙白骨連

送白眉之西京陳督府幕

無限離情酒重傾送君長嘯暮雲平  
巍褱再見新明闕帶礪猶然舊漢城  
幕府風清初握箸將星雲淨正當營  
十年養就芙蓉劍此去應知好發硎

自弔

命也何當百六秋塵途空戴楚冠遊神能奮處仍飛涕石有靈兮亦點頭報國誰堪追  
定遠傳家我已愧留侯姓名他日昭人目幸不遺汙史冊羞





# 張文烈公軍中遺稿校勘記

永曆戊子羅應垣序

永曆己丑吳以連序 張邵村刻本鄧秋枚排印本張篁溪刻本皆無此兩序

讀史十首 第一首讀史高齋日正紅 秋枚本齋誤齊

也有強梁向海東 粵東詩海向作在

第七首孤忠噴薄又成詩 秋枚本噴誤憤篁溪本忠作臣

第十首東官曾有誇封禪 秋枚本禪作伯邵村本末二句皆作空方殆恐觸時忌故闕之

讀文文山集集句六絕 第二首江山有恨消人骨 邵村本篁溪本皆消作銷

述志 肯將然諾負初年 邵村本篁溪本皆無此首秋枚本肯作敢

誓與清夷不共天 秋枚本清夷作新朝亦恐觸忌諱以意改之

出師 偶整王師陌上遊 秋枚本偶作獨邵村本篁溪本皆無此首秋枚本與上詩同次在將發之

後

過荒村四絕 第四首狐豕妖氛障太清 邵村本篁溪本皆無此首秋枚本豕誤矢明楊基梁園飲

酒歌云狐豕墮突羣兕吼與此詩語同

途中八絕 第三首青山無地不羶腥 邵村本不羶腥作空方

俯仰興思不涕零 三本不皆作一案不字未合語意且與上句重作一爲是

第四首燈下嬌姬月下絃 詩海題作途中感舊嬌作妖絃作筵明詩綜亦作妖

如今回首神京處 篁溪本如作于明詩綜詩海處皆作隔

第六首數聲鷄犬白雲閒 篁溪本閒作間誤

第七首家藏三畧已湮消 三本湮皆作煙

幾回翹首望圯橋 秋枚本圯誤作杞

痛悼先塋被伐 篁溪本伐作發 衍案文烈集答張翰林書云伐祖墓墮祖祠似以作伐爲是

祖骸仍暴委蒿萊 詩海暴作復



早行河源 奇鳥□□互悲聲 邵村本秋枚本□□作相叫篁溪本作奇鶻相叫

虜騎追迫投宿村莊 十九日楊邦達大戰於分龍嶺 時事 三本皆無此三首

追昔 詩海追作憶

如今轉憶宸遊地 詩海如作而

春閨寓興 詩綜詩海皆作閨思

第二首竹林啼鳥送春歸 詩綜詩海送作遍

謁大司馬自翁袁老先生遺祠 此題三本並作謁大司馬袁自如先生遺祠

得蕭年兄西京大捷之札志喜 此首末二句邵村本作空方

夜雨 望入江關愁極目 三本入皆作斷

夢回京國涕沾衿 三本衿皆作襟案原文是衿與夢字相貫

不寐 擊楫誰憐士雅憂 衍案四部叢刊景宋本晉書祖逖傳作士稚乾隆武英殿本同考證云監

本作士雅蓋明人多據監本

未信西戎可繼周惆悵胡塵思欲掃 邵村本此二句末五字皆作空方

難中聞逆首買健兒刺余獻虜 邵村本篁溪本皆無此首秋枚本次在傷我明所用不得人詩之後

又虜字作敵

縱死但知存骸髑 秋枚本存作全

雨行馬上 國破匈奴千古恨 邵村本匈奴作空方

丁亥重陽悼陣亡將士 □聞節候又重陽 □聞秋枚本作忽聞邵村本篁溪本皆作忽驚

斷腸何處啼猿月 夢當階唳鶴霜 秋枚本啼猿唳鶴並倒作猿啼鶴唳

擊楫幾時清海浦 秋枚本清字作空方

蚤路 三本皆無此首

謁大司馬自翁袁老先生遺祠 三本皆作袁自如先生與前首同

夜走博羅第一首 眞同喪狗生無愧 秋枚本愧作賴似較勝

黃牛逕 悲秋 三本皆無此二首

感遇 第一首宵行秣馬傳殮食 三本皆殮作餐兩字通用

終化春山哭杜鵑 三本終皆作總

第二首獸蹄鳥迹交中國 邵村本上五字作空方

行次白石堆投宿村莊有園花盛開感賦 秋枚本有作見次在輓陳同盟之前邵村本篁溪本皆無

此首

人物傷心換六朝 秋枚本換作撫

營中晚坐 腥羶我抱淪胥痛 腥羶二字邵村本作空方秋枚本誤倒

燈下偶讀武子十三篇 憶余爲諸生時 軍中懷羅孺文 軍中懷康之姪 屢欲提師入衛西京

奈前途阻絕不果 軍中同諸謀士夜談 月夜避地徵兵 三本皆無此七首

輓陳同盟 邵村本篁溪本皆無此首秋枚本次在卷末

撥悶 烏龍岡宿王守愚茅堂 三本皆無此二首

憶京華 注少嬪朝陽皆宮名 秋枚本無此注



憶朝 集集夔龍綵仗前 寫溪本集集作濟濟

祇今羊犬縱橫處誰輓天河洗穢羶 邵村本秋枚本羊犬穢羶並作空方

傷我明所用不得人致有今日之禍 邵村本無末首三本皆在卷末

第一首不見犁庭殲醜虜 邵村本下五字皆作空方秋枚本醜虜作勁敵

零落朝儀建業鍾 三本鍾皆作鐘

榕溪曉發 生還何必爵通侯 三本通皆作封案此對上句蠅作客則以封字爲是

憤處猶堪刺虜頭 邵村本秋枚本刺虜皆作空方

楊邦達生擒渠魁五人後皆狡脫良可嘆哉 秋宵不寐 三本皆無此二首

宿田家早起 睡到鶯啼懶下牀 三本到皆作聽

哭楊邦達 酣戰誰方許虎癡 屈大均撰文烈行狀載此聯方作尋

願壯山河殄裔夷 邵村本壯作葬殄裔夷邵村本秋枚本皆作空方

舟中夜泊 對月 三本皆無此二首

秋宵月夜 奮來按劍轅門坐 三本奮皆作憤

送白眉之西京陳督府幕 三本皆無此首

張文烈軍中遺稿二卷乃永曆三年其姪孟器所刻香山黃慈博佛頤鈔自友人者也東莞張邵

村其淦有光緒二十九年木刻本鄧秋枚實有光緒三十年鉛印本（在國粹叢書內）東莞張

篁溪伯積有民國三年木刻本（在滄海叢書內）取而校之此本多羅吳二序及詩二十首且

字句並有不同之處爰記如右以備考稽張邵村藏有文烈公名山集芷園文稿二書均是初刻

本說見所輯東莞詩錄二十一 若得以付石印尤爲大快耳庚辰季秋南海黃任恆識

永曆三年己丑東莞張備刻軍中遺稿世極罕見時爲順治六年先一年李成棟反正復明正朔

故得而刻之翌年廣州再陷印本不多乾隆間禁燬書目亦未著錄黃慈博藏有影鈔本余假之

錄副前有羅應垣吳以連二序又有佚詩二十首爲張邵村鄧秋枚張篁溪三本所無秋枚本存

詩八十三首較多合以佚詩正與王船山永曆實錄云軍中稿有詩百餘首相合至可寶也吳以

連字泰茹南海人崇禎丁丑進士張備字孟器文烈姪也明亡後皆隱居以逸民終詳見陳伯陶

勝朝粵東遺民錄羅應垣序自稱徵士疑卽佚詩中之軍中懷羅孺文徵士從軍不果其人歟清  
曾修養甲曾使東莞李覺斯誘文烈降往來書牘見集中讀吳以連序乃知讀史十首爲遣逆之  
作卽覺斯也故悲秋詩有可憐司寇堂堂職忽負君王作叛奴之句丁亥十月增城之役文烈以  
戰敗自沉水死修使覺斯馳往驗明正身以銀鑲義齒爲證拱手稱賀云黃秩南嘗取邵村秋收  
篁溪三本互校余更取屈大均文烈行狀引詩文烈集答張翰林書明詩綜粵東詩海勘之附黃  
校中爰記其後讀者審之一九七三年十二月汪宗衍識



屈大均撰

張文烈公行狀

據陳伯陶聚德堂藏書刻本



欽命總督武興營軍務兼理糧餉聯絡直浙節制江西招  
剿敕賜銀印捧持御節便宜行事翰林院侍講兼兵科  
給事中加服俸一級贈資德大夫正治上卿太子太保  
東閣大學士吏部尙書加贈奉天翼運中興宣猷守正  
文臣特進光祿大夫左柱國少保兼太子太保武英殿  
大學士吏部尙書增城侯諡文烈張公行狀

東莞爲忠義之鄉宋末有將軍熊飛許之鑑以布衣起兵  
於花溪銀塘之間從文丞相大破元兵復韶廣二州失機  
以死國朝有都督陳策鎮撫關鎮明以五千之兵遮滿洲  
數萬於渾河口血戰數日殺傷相當絕援以死四君者皆  
萬人之傑義不與強敵並立煌煌忠烈載在史書逮中興



之初則復有文烈張公其人焉自廣州陷公首建義旗以爲諸豪俊倡於是東莞山圍水砦所在人民戈甲雲興競爲兵首以與敵人決命爭一旦之生死蓋縱橫數百里間小者百人之奮大者萬人之鬪金鼓之聲晝夜喧闐不絕一皆稟節度於公以爲進止嗚呼公何以得此於東莞之人哉計敵自入粵以來所將精銳及西北遼人爲公部曲所殲髓到涸腦西鄉十而三四存者亦瘡痍之衆雖欲不反正歸誠以十郡還之天子勢不可得公以敗爲成十郡雖不自公恢復而卒使惠國乞降行朝再造兩廣得見中興之盛者公之功也公敗之於東而成之於西所由與陳文忠陳巖野二公同爲佐命元勳之冠歟公之戰績東莞

人人能言之他州郡弗悉也公季弟琳請余爲狀余詢諸公門生故將曾隨鞭弭者一一書之與四朝成仁錄互有詳畧各從文之體製云爾公諱家玉字玄子號芷園東莞萬家租人唐文獻公九齡弟殿中監九皋之後爲韶州刺史君政所由出宋末有諱峴者自福清來作尉海豐遂遷東莞之圓沙子姓繁衍至數千人以文學行義政事稱者肩摩踵接爲衣冠望族十七傳至公與從祖恂遂以忠烈益光大其家公曾祖諱宗尹祖諱明教父諱兆龍學行端純並有隱德爲宗中耆碩公生而通敏穿穴經史才具博大有經緯天下之志幼從諸同學登黃旗峯峽險皆有難色公獨造絕頂舉觴屬其師林公游曰我輩作人非第

一流不可林公驚異之爲人頎而長貌英秀好笑語白皙微鬚眉目如畫好戴折角巾光髻鮮衣風流自喜而文豪武俠慕雲長公瑾之爲人年十九補廣州儒學生員崇禎九年舉於鄉十六年成進士出左諭德周公鳳翔之門殿試三甲觀政工部選授翰林院庶吉士先是倪公元璐夢一童子持旛自天而下旛有詩曰謹記崇禎十六年聖明天子大求賢從今絳闕天魔墮輸與金旛玉局仙倪公以公名應夢且負大才絕器重之館課三以公詩歌居第一撰誥敕輒以屬公十七年三月京師陷周公殉節遺書與公曰玄子爾雅溫文貌若婦人女子然中懷剛毅定知大節不移書未至公已罵賊矣初賊李自成欲授公官公致



書欲自成賓禮之而不臣而題其門曰明翰林庶吉士張  
先生之廬不然臨以刀鋸將形影相笑而樂蹈之自成見  
公於中左門賊令公跪公曰前上書不上疏請賓不肯臣  
今日當以賓禮見因長揖不跪自成笑曰我定要爾做官  
公曰我定要不做官因數自成十罪自成怒命僞錦衣衛  
四人持出斬之公大笑而退自成釋公令懸撻之於五鳳  
樓皮開血迸七日不食垂死自成再使軍師牛金星說降  
公不爲動後賊出東關公乘間得脫歸里思宗安皇帝立  
以六等定從逆諸臣罪阮大鍼欲報私仇謂致先皇帝殉  
社稷者東林諸臣也不盡誅東林諸臣不足以謝先皇帝  
公旣爲倪周二公所器重大鍼因目爲東林邪黨謂公請

厚葬俛周二公而薦劉公宗周黃公道周於自成刑部尙  
書解學龍受其指以公列於五等保國公朱國弼等合疏  
糾刑部六失詔革學龍職以高倬代之高公正直欲上章  
訟公及簡討方公以智冤弗果逮問至公慨然就道曰此  
行當爲君父雪耻除兇當日之事諸朝臣屬目豈俟向一  
人求白也其大父則謂之曰我太祖表正華夷蕩除亂賊  
直將孔子全部春秋一身做出孔子口教太祖身教太祖  
賢於孔子未有不中興者也而南都卿相未善奉行意今  
歲來年當有白水黃衣奮起建非常之業我孫此去定有  
遭逢當放出參天贊地之手爲太祖做一番事業已而公  
遂攀龍飛之聖首先建策公大父預識興廢其言明驗若

此公至南京有爲力辨者得復原職已而車駕北狩乃走  
錢塘江上與監軍副使蘇公觀生水師總兵鄭鴻逵等擁  
戴唐王王高皇帝九世之孫生有紅雲黑龍之瑞龍行虎  
步目若朗星譬欬若洪鐘豁達大度濬哲英明恭儉仁慈  
清心寡慾愛人禮士博學工文少遭家難力報父讐興兵  
勤王爲法受過安皇帝立乃出鳳陽潛邸先是王至嘉興  
臣民擁戴王謙讓轉奉潞王潞王不振謬從邪議降敵以  
救民公與諸臣乃奉王入福州以閏六月初七日監國二  
十七日卽位是年乙酉改爲隆武元年卽宏光之元年也  
是爲紹宗襄皇帝公大告於諸將曰昔漢光武起南陽以  
高祖九世孫爲長沙定王後建元乙酉卽位六月其兄伯



升兼有朱鮪李軼之難今皇上亦起南陽亦爲定王後亦傳九世亦建元乙酉卽位六月而且兄弟之難父子之難常變又相準也揆之天命如此度之人事如彼天與人歸真中興之主也諸將皆以爲然謂公斯言不啻王命論云上以定策晉公侍講兼編修旋以大學士黃公道周薦命給筆硯掌起居注公疏謂起居有注所以書天子之言動也臣今直書無隱願皇上無取覽所書於臣否則臣死不奉詔上以公侃侃有古大臣風因書其疏御屏賞銀三十兩以旌其直七月六日上大誓文武於天興府西郊登壇受鉞遣將分征命定虜侯鄭鴻達出仙霞關永勝伯鄭彩出杉關總兵官施福出崇安關總兵官黃明俊郭煒出分

水關少保黃斌卿督水師由海道以抵溫台靖虜伯方國  
安率師援浙而平虜侯鄭芝龍督禁兵居守公知兵數條  
陳恢復大計請效戎行上奇愛之諭曰爾年少英俊文武  
兼資朕今以兒子視爾朕中興大事今以託爾乃命以翰  
林院侍講兼兵科給事中監軍御右營聯絡直浙節制江  
西招勦敕賜銀印捧持御節便宜行事同永勝伯鄭彩督  
兵平江定京八月復命公兼理吏戶禮三科事諭以戮力  
匡復矢謀蕩平稽察兵餉覈功論罪所過都邑有司不時  
舉劾隨地調補忠孝節義及立功贖罪等人一聽赦錄旌  
卹朕弗中制十月公先出關至廣信聞南建徽州並陷謂  
腹心之患在洪都咽喉之患在徽郡乃疏陳進勦分合之

法上以公言言確畫命速催鄭彩出關由建撫立功彩懦  
觀望不前駐軍邵武月餘未嘗一矢加遺公枕戈待旦精  
慮不遑按行營壘日以忠義鼓勵諸將十一月撫州圍急  
彩書與公使督率諸將往援公卽東約右鎮陳輝西約中  
鎮林習山南約前鎮蔡欽會兵於許灣十四日敵至公令  
蔡欽所部衝鋒斬六級馬四匹敵少却親督右鎮所部長  
驅出營大戰十餘合斬敵總二級兵三百二十三馬四匹  
得生馬三十一匹器械無算薄暮都督陳有功叅將葉壽  
再戰死敵糾難民數萬鳴鑼吶喊飛箭雨射沿山放火軍  
中寒慄又復陰遣書招誘我將趙珩令之勸降公慮軍中  
疑忌變生肘腋執珩手拔刀斬案曰敵人行間離我兄弟



我兄弟益當戮力撲討敵人敢有疑謗者斬因設高皇帝位牽諸將泣拜剖~~其~~胸肝誓決死戰出犒賞二百兩選驍悍郭毓卿李忠明陳良趙珩四將築壇拜之令各領死士百人分伏伏已拔大營走敵以萬人追擊伏發斷爲二公鼓噪回軍大破之步兵斬捕殆盡騎捨馬渡河率溺死是日公卽爲蠟書使都司黃瑛等帶健丁數十人冒重圍間道至撫州縋城而入與永寧王所部謝忠良蕭聲等乘虛出襲批搗老營敵驚走自相蹂躪十六日又夾擊之於千金坡斬五百餘級馬三百餘匹釋難婦女二百四十三人獲搢紳手書七道悉焚之一時永勝之兵稱義師焉而撫州圍解全郡克復捷聞上優詔褒獎懸進賢伯世爵以待

但進南昌卽行封拜是時公以監軍之臣竟行督師之事制勝出奇功勞遂出彩上彩畏惡其能公謂兵宜神速乘敵大創之餘並力而前可以席卷江右數請彩出師先發制敵彩不得已於二年正月十六日遣前鋒至硝石俄聞警急卽盡撤兵入關棄新城不守公力爭謂新城永定屏障永定福京門戶新城雖小不可棄也請留一鎮彩不從公乃與新城知縣李翔招募鄉兵以守事未集敵騎突至翔登陴公出擄戰領親兵八人鄉勇二百人鏖於城南斬步兵五十餘級公傷箭墮馬臂折意氣益厲都司林雄等扶絮被冒陣貫其東西斬二人馬四匹奪公以歸上聞謂統兵大將僉走入關獨使文臣陷陣何以自解詔下責彩

而慰公曰爾許灣之戰建撫以復新城之守杉關以宣威德華夷共見忠勞天地咸知今者箭瘡勿藥宗社賴之特晉爾都察院右僉都御史巡撫廣信仍准帶翰林舊銜公以無功疏辭不拜公故與鄭彩戰守之策不同欲聯絡閩羅宋之兵彩不許欲同鎮建昌易懦將周斌斬逃將王象乾彩亦不許上於是欲獨將公然無兵公請給假三月返粵之惠潮將藉其餉八萬招練兵一萬爲進取江西計上許之賜營名武興公爲監督總理八月至鎮平會山寇黃海如張甚公單騎往諭降數萬人購其黨斬夾翼虎禿爪龍獨角蛟三渠又有寇黃元吉與其渠三十六人焚劫郡縣遣書招之亦以所部萬五千人降旋叛去購其黨斬元



吉於桃陂而潮惠寇遂平選精銳萬人分爲五營餘悉散遣疏營制以聞上喜詔卽帥之赴贛而公至潮惠支餉止得一千三百餘兩捐納止得一千五百餘兩此外分毫無有士卒方飢不可以戰公疏謂兵以無糧而寄命於民民以苦兵而乞命於敵國事所以日壞今孤軍深入殺人求食我賊民民亦賊我勢必潰散夫有糧則有制有制則百姓親士豫附是勝兵也勝兵先勝而後求戰糧至則臣兵出矣疏入未報九月車駕親征至上杭御營不戰而潰公聞上將入粵引兵出迎卒遇敵于赤山之陂兵弗肯戰職方司主事賴其肖曰方今主上蒙塵我曹當首先死敵以明忠義敵易與耳衆曰我飢非畏戰請一戰以謝貝勒遣

辮髮四人招降衆將起而劓之碎其脾遂潛繞敵背而伏  
誘敵騎入山谷中率勁弩馳射斬獲十餘人敵迸走公拔  
還鎮平士卒皆盜賊之餘糧盡終無固志公遂嘆息曰廉  
頗思用趙人集吾東莞子弟尙可爲也會有大父之喪遂  
抵家是冬十月今上監國於梧州唐王與鄧周益遼四王  
航海至閩部蘇公觀生遣主事陳公邦彥上箋勸進於上  
旋以唐王乃襄皇帝母弟兄終弟及復推名分立之改元  
紹武召公以禮兵二部右侍郎三使御前辦事中書至公  
辭不拜十二月望廣州陷口總督佟養甲聞公有能將英  
名心憚之遣口副使張元琳說降啖以官爵公義冠出見  
叱之曰與爾同作庶常受恩於威烈皇帝何故貳心憤咤

作色遣之養甲復致書劫公公答曰丈夫得志則立事功  
矢志則存名節我燕京罵賊思文皇帝嘉之寵我曰朕以  
子子爾爾以父父我我受聖明恩重下髮背之不忍今若  
拔我一莖雖尊我爲清朝天子弗屑也區區官爵何足云  
永厯元年三月四日公起兵先是正月蕉麗到涪二鄉生  
員莫子元布衣何不凡等以船楫黃頭郎四出捕敵敵方  
搜括諸鄉縣金帛子女絡繹走江中斬敵渠數人兵數百  
人得所奪文武印信數十顆口知縣鄭鋈遣使至到涪說  
降首領葉如日等執而沈之口副使戚元弼遂率兵攻到  
涪大戰六日殲敵二百餘人敵以書招降陣士佯許諾潛  
使人往涪涪沙灣市橋古勞諸處乞救得義兵千艘入自



虎門大戰殲敵二千人燒敵白艚三十八櫓哨船百餘得  
口總兵陳甲殺之是役也爲敵入廣東以來敗衄之始報  
至公笑曰敵以數騎破廣州不能以百餘艘艚破一到滘  
異哉到滘之人可用也吾事濟矣遂使叅將陳登雲往約  
尋以戰艦來迎公至得驍銳五千餘人申明約束大誓師  
十四日揚颿至東莞而使兵部主事韓公如琰率黃牛逕  
之衆千人叅將李乙木率黃藤園之衆二千人族人世爵  
光正等率其父兄子弟篁村壘下之衆數百人從陸爲助  
戰鼓未伐南門已開遂復東莞執口知縣鄭鏐斬口典史  
趙元鼎以徇以原訓導張珪爲知縣以原副使張公恂爲  
指揮僉事以安宏猷爲城守十五日公還到滘再治兵爲

攻復廣州計原刑部尙書李□□主事李夢日總兵王應  
莘馳書報敵十七日敵至大戰於萬家租居人四面叢擊  
一日夜殲敵數百人公還軍於金鰲洲戰初交殲敵數十  
人我舉火敵亦舉火風反我舟逼柵口被火遂敗績時萬  
家租戰酣飛彈如雨一婦人經其下火器悉暗不發敵舟  
遂抵岸岸之東已敗岸西猶立如堵牆巷戰死者前後相  
屬敵屠之並屠篁村塋下東莞再陷珣戰於東門而死宏  
猷戰於西門而死恂走至錢屋田原叅軍李盾香以兵追  
至親割恂首三蹴之持以獻敵公退師到濬口提督李成  
棟先擊望牛墩以孤我唇齒大戰七日夜敵死數百人卒  
被破遂攻到濬以牛皮絮被擁蔽冒礮火破柵門而入血

戰三日敵死千餘人載屍還廣州舢舨不絕然我力亦竭  
圍落遂陷公以三面與敵開一面走敵屠到涪守備葉品  
題何勉葉時春盧學德千總何仕登巷戰死之公大母陳  
氏母黎氏安人妹石寶赴水死公妻彭氏安人被執大呼  
我張總督夫人賊敢辱我因大罵敵斷其支體以死如琰  
家屬二十人並死壯士負公走屑香悉兵追之不及遂至  
西鄉大豪陳文豹布衣士也當甲申國變團練二千人保  
障西鄉威恩大行爲山海諸盜所服其母年八十先一夕  
夢黑龍止其家有光閃爍明日公至衣黑衣母大驚異因  
曰此天人之傑也發窖中銀二囊與其子爲公召募公承  
制授總兵官旬日間義旗復振出復新安縣斬馬兵三百



餘級步兵一千五百餘級四月十日戚元弼及成棟義子賈九率水陸兵大至陸兵所經北柵勞德大窋烏沙沙頭諸鄉凡十餘處土人爭出堵禦老羸婦女悉持兵仗率於要隙樹木爲干欄人持數十短挺挺末悉有鈎連綴數十短挺於一大挺以長繩繫之敵至被撒挺飛鈎死者人馬不可計敵增兵奪險得至西鄉我總兵梁中英浮舟師數百艘來援旣合戰獲敵二大鬪艦斬百級敵以紅毛鬼子數百爲先鋒人持雙倭刀擁花蜀跳盪而來中軍叅將趙省一揮兵以鈎竿刺之並得其崑崙舶敵遁去公遣叅將何不凡率兵六百疾走諸鄉召募得三千人乘虛襲東莞未至口知縣施景麟率兵至白沙來拒問計於叅議鄭瑜

瑜使其衆助敵戰於赤岡我師勝之斬數百級得推官尹  
希臨口口之婿爲敵前驅者也追至河田墟復擒四十人  
公斬以徇五月廿一日遣兵至東莞攻三日垂拔何四舍  
撓軍斬之廿五日公親率兵至東莞降盜司徒義開城待  
戰公揣彼逸我勞彼飽我飢戰恐不利遂收軍還至北柵  
我兵散歸諸鄉未集司徒義導敵兵力追公馬陷泥淖中  
長鎗幾及一戰士以鉞挑馬馬驚一躍而起遂脫去得達  
西鄉成棟復來攻我舟小彼舸船大公謂文豹等曰虛而  
示之實令砦上徧列旗鼓佯書約戰潛與衆登舟匿他島  
敵至疾攻砦上一礮不發疑有伏薄暮謀知無人乃入舉  
火燔砦公見火起與文豹等反擊成棟不備大創死者千

餘人棄舟走數日復盡銳來攻公守砦中文豹等戰砦外  
水戰其陸陸戰其水凡二日我舟師先敗公且戰且走至  
於鐵崗途經萬家租視家廟間舍悉爲灰燼親戚宗族亦  
屠戮過半矣痛哭而去先是口口等獻計於敵謂公之所  
居以家廟爲虎頭金鰲洲塔爲虎尾摧其首尾彼將自壞  
敵從之並掘公祖墓又使其子爲敵設邏兵布遊哨下令  
有敢匿張氏者殺無赦於是張氏死者前後及千人遂爲  
忠義之族公旣行西鄉力盡亦陷文豹及監紀推官王者  
肱監紀通判李乙木都司陳蘭穀守備葉如日葉進之葉  
文明胡起新生員曾廬桐等戰死敵屠西鄉蓋敵三攻西  
鄉而兩敗兩攻到涪而一敗死者凡萬餘人東莞之到涪



新安之西鄉敵聞之至今昨指以爲鬼門之關也公至鐵  
岡得姚金之衆千人陳穀子之衆千人遂走十五嶺簡練  
復得羅同天劉龍李啟新之衆三千人先是四月二十九  
日公遣總兵陳鎮國叅將馮家祿等往攻龍門復之斬口  
知縣林之秀口敎諭藍興口典史汪熊口巡簡嵇高斬四  
百三十六級至是公入龍門安輯已乃帥兵往博羅復之  
斬五百一十級執口城守朱振邦以李顯謨爲知縣以廖  
習梧爲敎諭於是分兵往連平州復之斬一百二十三級  
分兵往長寧復之斬口知縣顧濟德斬四百七十五級攻  
惠州三日不克克歸善縣守備陳瑞昌戰死遂還博羅敵  
來攻圍二十日城卑小我軍以鹵盾遮蔽得箭數十萬聚

而焚之敵望而氣奪衝梯旣盡從胡盧嶺鑿地道實火藥  
火發城崩肉薄而上習梧冠帶緋衣方僞爲公巡行樓堞  
持旛前導步馬雍容敵競射之以死以爲公也公以故得  
免敵屠城顯謨及守備劉麗敬千總葉奇才葉文揚並戰  
死公旣出山谿艱險馬屢蹶參將陳瑞龍負公走追兵及  
瑞龍拾礮石飛擊敵死者數人公得脫復返龍門大召募  
旬日得兵四萬分龍虎犀象豹五營遂至增城公營於南  
門諸將營於西北十月朔敵至首領爭出至十里逕口逆  
戰勝之得一魁帥奪一大旗旛敵披靡退走諸路義兵赴  
援從五指山綏福燕清來者又得萬人初四日敵至我兵  
爭出逕口勝之初七日敵至又勝之凡三日三勝斬一千

九百餘級馬四百九十匹敵知我兵剽疾難持重故以利  
嘗我然亦崩摧甚矣初十日敵大至瞭望者搖旗不已我  
兵驚駭膽忽餒莫肯前敵奪逕口而入燒一小營從五指  
山諸處來援者也西北諸處望小營火起懼而陣動公弗  
能止敵遂圍中軍公擂鼓鼓士自辰至未血戰斬馬數十  
匹人百餘級敵騎散走據平岡而止公稍收軍令以五千  
人衝鋒以五千人守壁我兵過勇空營逐利軍法出張旗  
入捲旗奪敵旗則麾而呼以入是日大旗總斬敵級多喜  
而忘之手綰數頭張旗入中軍獻功西北諸營望見張旗  
以爲敵入中軍皆走保壘前軍見後軍走亦驚曰敵出我  
後軍遂亂自衝西北二營以散成棟疾以鐵騎下蹂之我



軍死者六千人公中九矢墮馬叅將陳瑞龍負而走追急置公叢篠中空拳奮鬪不勝公躍入野塘以死敵得公屍佩一銀印文曰光明正大襄皇帝所賜也養甲集諸降紳驗視口口跪而賀曰此真逆賊張家玉首一齒缺以銀鑲之髮美長二尺三寸許量之果然敵懸之東門經月色不變一日養甲過其下公怒眦睨之雙瞳飛出丈餘光芒四射養甲駭慄以爲神公旣死諸文武將吏死亦畧盡增城之役可知者龍營則總兵黎昭傳盛羅同天虎營則總兵陳奇棟楊威雄叅將李輔明守備丁善和葉秀芳黃鎮朝李嘉伍千總梁定興徐大佐等同公而死者也萬家租之戰則公從弟有恆貢生尹鉞望牛壑之戰則叅將楊邦達

公常哭以詩所謂丰標無復張文遠酣戰誰尋許虎癡者也北柵之戰則推官陳伯耀潘汝隆赤岡之戰則主事鄧棟材叅將王贊廷陳子英龍門之戰則武舉譚高謀原清河知縣譚高擢博羅之戰則主事韓如琰守備方如璇干戶侯成祖遊擊譚立志生員韓二見等先公而死者也餘死者莫詳名氏皆身經數創染鏃膏刃以爲國殤以報君父者也公仲弟家珍年十六勇決無前號小飛將到涪之敗家珍走入水敵鈎及衣亟脫之以泅赤身行水底數里氣急躍而上觸船額裂復沒水凡踰水八重乃至赤嶺倉卒以巫師符印鈴黃紙畫一花押爲軍號收得殘兵六百赴西鄉助戰斬馘功多連平長湍之復皆與有力增城之

役公從弟都司有光年少似家珍被執給敵曰我張總督之弟家珍也大罵奪刀斫敵檻至廣州使之跪抗聲曰忠臣之弟不跪敵屠裂之公常遣之蒙險致書與陳文忠約爲犄角者也從弟雷禎在公帷幄久授監紀推官戰敗同陳瑞龍走十五嶺護公之父後爲讐所中以死與有光皆以義俠稱公歿之六月成棟反正思恩侯陳邦傳首上章請卹上幸肇慶於龍舟顧問公全家死難狀揮涕久之輟朝一日公父與兵科給事中李貞並奏以聞詔贈資德大夫正治上卿太子少保東閣大學士吏部尙書祖父皆如其官錫之誥命廕一子中書科中書舍人旋以皇太子生覃恩加贈太保兼太子太保武英殿大學士吏部尙書仍



加奉天翊運中興宣猷守正文臣特進左柱國光祿大夫  
增城侯曾祖祖父皆如其官皆贈增城侯父封增城侯廕  
一子錦衣衛指揮使世襲父兆龍陞見上慰勞備至曾祖  
母盧氏祖母劉氏繼母陳氏母黎氏妻彭氏皆封一品夫  
人又贈侯夫人公無子以弟家珍承廕錦衣衛指揮使仍  
加後軍都督同知侯家珍生子以嗣公一廕中書科中書  
舍人一廕指揮使世襲賜祭公及祖母母妻二十四壇遣  
禮部主事陳子履宣諭賜公葬以眞首香身葬於將軍嶺  
亥向之原園禁如例遣兵部主事倫鳳翔宣諭賜金五百  
兩勅有司造坊建祠公生於萬曆四十三年乙卯十二月  
十三日終永曆元年丁亥十月初十日享年三十有三年

二十二舉於鄉二十九成進士爲庶吉士三月侍講兩月  
監軍總督祗席於鋒鏑者十七月嗚呼公受恩於烈皇帝  
淺而受知於襄皇帝深所以報之者亦可謂至矣夫襄皇  
帝以英文耀武之姿躬統六師奉行天討可謂大有爲之  
君乃御營文武諸臣不能扶持顛沛迅掃兇殘棄其君於  
矢石之中之死而不救主辱臣死之謂何嗚呼有君無臣  
之痛三百年間前有威宗後有襄皇帝我朝之君父何多  
不幸若是哉豈非天乎天不使襄皇帝成中興之大業公  
雖優於將畧智勇絕人其何能爲襄皇帝常語公曰朕痛  
憤國讐枕席之間常有淚痕朕不入閩不興不出閩不成  
今者車駕親征身等鴻毛爲二祖列宗救茲二三百姓有

進以死無退以生艱難險阻唯卿與共嗚呼公血戰以死忠壯之勞於是乎襄皇帝知人之明爲不負矣至於提烏合之衆水陸進攻家自爲軍資人自爲鬪具使勅敵讐服首尾狼顧喋血千里救死不贍而邕管之三宮無恙桂林之諸將不驚崑崙關之一夫可守則公之有功於中興也雖不能救襄皇帝於一月之中而猶能救今上於二千里之外亦可以瞑目於九泉也夫吾粵固多忠義宋厓山之變英豪痛憤謂蒙古滅中國人人得而誅之於是競起兵以伸大義終元之世粵人所在橫戈伐鼓怒氣凌雲無一日不思爲宋復讐計元八十年間與粵人力戰蓋無虛歲元可以得志於中原而不能加威於吾粵粵人之爲元患



也久矣而東莞爲甚東莞豪傑在皇明開國則有何真在中興則有張文烈嗚呼詎不偉哉公之兵或取之四民或取之羣盜女子褰裳而用命兒童白打以當堅白相部勒不煩指揮其戰也人以竹索爲縶絳布屯頭跣行荆棘口含刀而手飛劍木棉之槍長可三丈三尺持之進四尺退四尺旋轉如電從地上挑起人馬擲之空中謂之八步長槍雜以丈二之竹篙錐藤牌絮被燠銅之鎗輪轉之鈚三眼鳥鎗獨彈龍銃敵之驍騎望而股戰一交旗鼓接風埃輒辟易崩奔不止公之忠誠又能使之無人不兵無民不信一其戰心齊其戎足至於敗也爲敵所屠鄉大小以四五十計人男女以十餘萬計而甘心赴難一無怨言雖時

乎不利一簣功虧而近張虎烈遠保龍興所以爲至尊効  
死者諸道義師弗能及也公才高博洽下筆千言在天興  
則襄皇帝詰敕高文典冊皆出其手在軍則有言兵事薦  
賢守疆諸疏其復養甲一書詞旨俊偉養甲讀而驚嘆以  
示諸降紳曰節概梗梗真大丈夫因令付史局時諸降紳  
有爲養甲羈留修史者蓋愧之也諸著述有大易纂義詞  
林館課燕山吟南遊草西征集厯代帝王世說名臣論贊  
百將妙畧其軍中遺稿讀史詩曾呈御覽荷蒙天賞公與  
師林公游定謀公之事不及詳者余詳之於林公狀中以  
見兩公相爲表裏云

永歷十三年歲次乙亥仲秋番禺後學屈大均頓首拜撰

按明史稱李自成陷京師家玉被執上書自成怒召之  
入長揖不跪縛午門外三日復脅之降忱以極刑不動  
自成曰當磔汝父母乃跪時其父母在嶺南家玉遽自  
屈人咸笑之此據錢狀甲申傳信錄傳聞之誤計六奇  
明季北  
略所記略同  
蓋本之錢狀考文烈自閩回粵時其父母猶在佟養甲

致書招之降答書怒憤不肯屈具載行狀中及起兵奉  
父母軍中奔走顛連萬死不顧詎有於八千里外因闖  
賊一言而遽屈膝之理馮甦見聞隨筆言家玉罵賊被  
縛執訊聞見其少而秀拔聲巨詞辨愛而釋之家玉懼  
不免佯爲文譽賊乘間南走明季南路亦云家  
玉上書蓋借以逃邵廷采  
西南紀事言家玉罵賊脫走大致與馮同且論之曰家



王神明英暢北都陷賊審權達節已名蓋天下並不言其跪闖賊當得其實全祖望跋崇禎十七年進士錄云予嘗得流賊所授降官簿一冊頗與諸野史所紀不同張家玉以庶常留館下家玉不入朝捕至不拜縛端門者五日釋之遂投書喻賊賊又臨以刃不動賊必欲授以官家玉忽遜詞受之人皆疑焉不知其以此張間而逃也又云南中解學龍再定六等逆案傳聞不甚有據如家玉反誤入之後世將何所信焉降官簿所言當最確與馮邵書合然則錢穀之誤全氏已辨之矣今觀行狀稱高公倬欲上書辨公冤又稱公至南京有爲力辨者得復原職蓋文烈爲倪文正周文節門人時阮大鍼

與東林構釁故入之逆案中然舉朝並知其寃旋卽前

雪明史不究本末逮采錢穀言使一代精忠蒙寃千載

此誤之大者也徐鼎小腆紀年但采錢錄未見馮邵書並鮎琦亭集亦未深考蓋明史惑之也

明史又稱家玉監鄭彩軍出杉關解撫州之圍不載其

有許灣之捷今觀行狀乃知文烈會兵許灣時以忠憤

激勵諸將驅率羸軍破斬勅敵厥功甚偉當時大兵

所至若摧枯拉朽無或抗者文烈此捷實宏光隆武兩

朝所未有此捷他稗史俱未載惟邵廷采東南紀事有之稱以爲福州戰功第一使非鄭

彩懦而媚嫉合兵前進直搗南昌雖未遽克然撫州必

不失守撫州存南昌有所牽制贛州必不受兵如是則

唐王可達江右無汀州之變以唐王之賢得何瞿諸將

帥輔翼之事未可知也天不祚明令文烈不克展其手足此可爲慨歎者至文烈起兵後大小數十戰斬馘之多敵人昨指明史削之體例應爾然明史所載家玉矢盡礮裂欲戰無具將傷卒斃欲戰無人烏用徘徊不決以頸血濺敵人手哉語此行狀無之綜觀前後文烈蓋一日不死卽一日起兵復讐當時山海諸義士誓死相從一呼卽集非萬不能脫必不肯遽以身殉或當日起水時無此數語也翁山與文烈生同時居同里

翁山曾寓東莞

所作行狀聞見較真實足補明史所未備末題永厯己亥爲順治十六年時桂王已入緬甸然是年七月鄭成功張煌言方陷鎮江進攻南京中興之望猶未遽絕故



一切稱述仍以身居明代爲詞篇中祖宗今上等字舊  
皆擡寫間有脫字疑有所觸諱鈔者缺之讀者以意會  
焉可也

真逸識



